

26/2/2009

<銘·惶·星>

故事簡介：

抬頭，望見天上的星星，
我想起你臉上閃爍著的淚珠，想起那愛哭的你。
直到現在我還在等你，
你到底在哪裡呢？

抬頭，望見天上的星星，
一閃一閃的，好像在對著我笑。
現在，我已經忘記了如何去笑，忘記了自己。
你還會等我嗎？

抬頭，望見天上的星星，我憶起我那不堪回想的過去。
我也曾經有夢，我也曾經天真燦爛地綻放笑容。
但是現實和夢總是對立的。
星星，不過是碎落了的礫石而已。

星星從不改變，改變的卻是我們。
星星依然發亮，可是我們再無法看見。

Scene 1

(眾人坐在椅子上)

(Lights up)

(眾人痛苦著，擺出不同動作)

(眾人一個個站起說話)

(一些人載上面具，反掉椅子，離去)

(沒走的在椅上更痛苦)

(他們站在椅上，望天說話)

(男站起，散下白紙)

(眾人除男外下，反掉椅子，離去)

(怡出)

怡：坦率、純真、愛幻想，當好多人仲係小朋友果陣都會擁有呢一啲特質。但當佢地逐漸成長，成為大人，面對住好多以前唔需要面對，又或者從來未想像過既野，就會不由自主咁為自己載上一個面具。

(男走至台右)

：但亦都有少數人，唔願意跟隨世界既步伐，忠於自己，願意打開自己既心扉去面對周圍既人。呢啲堅持自己既人，佢地嘅存在就好似夜空中嘅星星一樣光亮，但好多時候，佢地都有辦法好似星星咁受到人地既愛戴同欣賞，反而往往受到傷害，受到排斥，甚至被稱為瘋子。

Scene 2

(怡媽出)(VO: 爸)

(腳步聲 + 收拾東西聲音: 如膠袋聲)

媽: 點解? 點解你要呃我?

爸: 你發現左? 不過算啦, 反正我而家都準備番上去搵佢。

媽: 我同你一齊咁耐, 個女都八歲啦, 我樣樣野都比晒你, 我做乜都為頭家。你唔好走唔好咁對我好唔好呀? 只要你唔走, 我地係可以重新開始過嫁!

爸: 喂, 冇人逼你咁為我嫁。要怪就怪你自己太天真喇!

(怡出, 站在後方看著)

媽: 我地明明講好左話要組織一個幸福嘅家, 一齊湊大我地個女架? 你仲話過會真心對我嫁!

爸: 我對個個女人都係咁講嫁啦, 你唔係真係信下嘍?

媽: 唔好走! 唔好走呀!

(關門聲)(媽跪伏在地)

怡: 媽媽?

媽: 樂怡。

(怡走到媽旁)

媽: 樂怡, 你爸爸佢走左喇, 以後就淨番我地兩個。

怡: (哭) 爸爸走左? 唔會嫁! 佢明明應承過我話會帶我去遊樂場...

媽: 你爸爸佢走左喇!

怡: 我要爸爸呀!

媽: (激動地抓住樂怡) 出面啲人冇個係好人尼嫁! 但只要我地有權有勢, 有錢, 有地位, 咁就唔會有人可以傷害到我地。你一定要學識呢個生存嘅道理!

(怡微微點頭)

媽: 囡囡, 我知道咁會令你好難受, 但做人本來就冇可能會咁簡單。媽媽就係因為太天真, 先會搞到而家咁。

怡: 但我真係好掛住爸爸呀。

媽: 我地下個星期就會搬走, 離開呢度, 如果你唔想同媽媽一齊住, 咁你以後就住姨媽度啦!

怡: (抱媽) 媽咪唔好唔要我! 我以後一定會聽晒你話! 媽媽唔好唔要我!

媽: 乖女。(摸怡的頭)

(樂怡在台走半個圈)(小男出)(怡出)

怡: 我個名叫陳樂怡。係我八歲果陣, 我媽媽就教我裝上一個面具去保護自己。當時其實我並唔明白媽媽講嘅野, 但為左想同媽媽一齊生活, 我就逼自己嘗試去做佢想我做嘅野。但當我迷失果陣時, 我遇到佢。

小男：哇！（從後拍怡）

怡：小男？乜係你牙…

小男：（驚）喂你做咩喊呀？唔係我嚇親你呀嘛？

（怡搖頭）（沈默）

男：喂喂！樂怡你咪埋眼吖！

怡：做咩呀小男！

男：我數一二三，你就打開眼望個天啦！一、二、三！（鬆手）睇下，有幾多星星！

怡：（開心）哇！真係有好多粒呀！啲星星閃下閃下，好似喺度嚟向我笑咁呀！

男：你終於都笑番啦！

怡：多謝你呀小男。如果唔係你，我都有留意到原來天上有咁多星星。

男：好朋友講乜多謝吖！

怡：唔！好朋友！

（望男）小男牙，其實我一直都好羨慕你可以咁堅強，仲成日都好似好開心咁。

男：我都有唔開心嘅時候嫁！不過我就唔似你，成日掛住喊！

怡：其實你覺唔覺得我成日喊好煩好無用呀？

男：咁我又唔覺喎！我就係鍾意你夠真！

（二人沉默看天）

怡：小男你可唔可以應承我一件事？

男：應承啲咩呀？

怡：如果…如果將來我地唔可以再見面嘅話，我地都係一世嘅好朋友。

男：做咩無啦啦講埋啲咁嘅野…

怡：小男！媽媽話下個星期就會帶我搬出市區住，所以…

男：（倒吸一口氣）（伸出手指尾）我地打勾勾吖！

怡：唔！打勾勾！（圈小男的手指）

男：我地以星星為約！我地每年嘅呢個時候一定要喺呢度見面！

男、怡：一言為定！

男：夜啦，我要返去喇，如果唔係就會比阿媽打嫁啦！

怡：唔，我都係呀。

男：咁好啦！早抖！（走）

男：早抖！

（怡、男走）

Scene 3

(怡入)

怡：(笑)你估我同佢有冇實現到打勾勾個承諾？

十年轉眼就過去，我對小男嘅印象逐漸咁模糊。出左市區之後，我同媽媽都改變左好多，我地擁有自己嘅公司，有權有財有勢，人地聽見我地個名都忌我地三分。

(人群從四方八面湧出，忙碌的樣子)

男：(拍甲)你好呀，我叫阿男呀！

甲：你好，我係 lemon，多多指教。

男：lemon 你好！

甲：呀你英文名係咩呀？

男：吓？ER…我有呀。

甲：啱咁好啦…我趕住做份報告俾 Lorraine 呀，遲啲同你講吓阿男！

(男走向乙)

男：你好呀，我叫阿男，係 Lorraine 既新助手。

乙：(吞吐) Lorraine 助手？噃，你好呀！

丙：哈，你已經係 Lorraine 呢三個月黎請既第八個助手喇。

(丁衝入)

乙：哇你仲有冇遲啲呀？

丁：(喘氣)係咁上下啦，好彩 Lorraine 未返黎炸！

(望男)咦你邊位呀？

男：我係 Lorraine 既新助手阿男！

丁：(從上下打量男)(冷淡)哦，你好。

(怡入)喂 Lorraine 返黎喇，歸位！

怡：(向男)你就係新請番尼嘅助手？

男：我係呀，我叫阿男，你好！多多指教！

(男上前伸手，怡不理)

怡：我 mark 左呢三日嘅 schedule 比你，你自己慢慢睇，我入去擺番啲野先。

(男接過 schedule)

怡：有冇問題？

男：有呀！

怡：你問。

男：點解你好似唔開心咁嘅？

怡：呢啲同公事無關嘅野請一律唔好問。

男：刻意掩飾自己嘅情緒，你唔覺得好辛苦架咩？

陳：(大叫)我要搵你地公司個 Lorraine Chan 呀，同我叫佢出黎！

你唔叫我自己入去搵佢！

(陳太、隨從出)

怡：陳太？請問有咩事？

陳：咩事？呢句話應該係我問你至真呀！你口口聲聲應承我，話嗰份合資文件會係今朝十一點前會 send 到俾我架嘛！而家遲左成三分零四十六秒，你係咪唔想我簽呀？

怡：陳太，因為貴公司既財政架構比較複雜，有好多數據需要處理，所以係處理上會有啲麻煩，但其實我地今朝一早已經做好左份報告，陳太你可以過過目。（遞上報告）

（陳掉走合約）

怡：陳太你聽我解釋先…

陳：我唔要聽呀。你遲左就係遲，解釋乜野都有用。其實你咁冇誠意，我大可以即刻搵過第二間公司同我合作。如果唔係念在我同你老細合作左咁耐，我呀，先唔會特登走上尼同你呢啲嘍妹仔係度傾約！

怡：（拾起地上的合約）陳太，你要我點先會幫我簽約？

陳：我要你跪低，求我幫你簽。

（男欲衝上前阻止，丁把男拉開在一旁）

男：做乜拉開我呀？

丁：緊係要拉開你啦！果份約係關乎公司既生死，不容有失架！

男：咁唔通就要 Lorraine 白白咁受氣呀？

丁：唉呢啲事成日都有架啦！你睇得多就會慣架啦。

怡：（跪下）陳太，我求你幫我簽約。

陳：哎唷唷，做咩好似苦瓜乾咁呀，求人要笑嫁。

怡：（笑）陳太，我求你幫我簽約。

陳：（冷笑）下星期一拎份野上我 office 啦。

（悄）細路女，日後你仲有大把野要學，哈！

（眾人走）

Scene 4

(雨聲)(途人出)(男開傘出，站到怡旁)

男：你咁淋落去會病嫁。

怡：(抬頭)我想自己一個冷靜下，比啲雨水淋下個人。你今日嘅 job 已經完喇，你可以走。

男：我可唔可以以一個朋友既身份黎陪你？

怡：我從來都有朋友。

男：(笑)咁就當我今日開 OT 黎幫你擔遮啦。

(二人沉默)

怡：阿男？

男：唔？

怡：你有冇試過被逼做自己唔想做既野？

男：冇喎，每次當我遇到果 D 我唔想做嘅事，我都會堅持唔做！

怡：如果我可以好似你咁堅持自己，咁就好喇。

男：其實你而家都係度堅持緊架。

怡：而家？

男：(笑)係度堅持一定要淋到成身濕晒先肯走。

怡：或者呢樣就係我唯一可以堅持既野。

男：你條命其實一直都掌握係你手入面，只視乎你點去揀。

怡：或者。

男：(指著水氹)哇！你睇！係大水氹呀！好懷念以前細細踩水氹嘅日子！

怡：你以前都會踩水氹？

男：係呀！

怡：你唔覺得玩水氹好白痴嫁咩？

男：唔覺喎，玩得開心咪得囉，洗乜理人點睇睹！不如我地玩水氹咯！

怡：咪傻啦，一陣整到成身污糟晒。

男：唏！既然我地都差唔多濕晒咯，咁不如玩盡佢，整污糟埋先一次過去洗啦！（用力踩水氹）

怡：喂我濕晒喇！

男：(繼續踩)尼啦，一齊玩啦！

(怡由閃避變成和男一起玩，二人玩了一陣就坐在地上)

怡：可以做自己想既野真係好。阿男，多謝你。

男：好朋友講咩多謝吖！

怡：好朋友？

男：(刻意帶開話題)雨停左啦。通常落完大雨過後就會個天就會變得好清，今晚一定會見到好多星星。

怡：我以前望見星星果陣，總覺得星星係會笑嫁。

男：係？我細細個嗰陣都有個朋友，佢一望見星星就會好開心，仲覺得星星係會笑嫁。

怡：咁佢而家呢？

男：（看天）自從佢搬走左之後，我就冇再見過佢。雖然我地約定會喺每年嘅八月十號見，但佢始終都冇出現過。

怡：（站起）夜喇，我要番去啦。

男：咁好喇，聽日見！（欲走）

怡：拜拜！

Scene 5

(丁衝出)

丁：(大叫)哇大新聞！大新聞！你地快啲睇下！係 Lorraine 呀！

(眾人除甲外湧向丁)

丁：X集團高層與 terry chow 週日於 bar 內親熱，高層穿 deep V 上陣，terry 多次伸手摸高層…

乙丙丁：哇好嘔心呀！

丙：哈，原來佢之前去左陪 terry chow！唔怪得我地公司同 terry 份約可以簽得咁爽快啦！

乙：真係估唔到公司女神係啲咁嘅人！

丁：(向乙)有乜咁出奇睹！佢為左份約連跪都肯嫁啦！

甲：喂快手啲啦，今晚八點前搞唔掂份約就要開 OT 搞掂佢架喇！

(眾同事歸位)

丙：(向乙)唉都唔明點解公司會同呢啲咁嘅人合作架。

乙：係啦，個林總係出左名嘅大淫蟲尼嫁！都唔知有幾多名模藝人比佢包起過呀。

丁：我仲聽人講，個林總成日對啲女員工毛手毛腳，如果佢地反抗，就會有好恐怖既下場架喇！

男：係咪真架？

丁：珍珠都有咁真呀！我收到風，上個月之嘛，BCC公司嘅高層同林總簽約嗰陣比林總非禮，佢一手推開林總走左，之後佢就請左一星期假，唉都唔知係咪林總搵人恐嚇佢添呀！

(怡出) (眾同事歸位)

怡：男，幫我 search 啲有關環球公司嘅資料，今晚 send 份 report 比我。我今晚有客要見，幫我飛晒所有電話去留言。(走)

(怡走) (一片議論紛紛聲)

丁：公司聽晚有份約要同林總簽，Lorraine 今晚一定係去搵佢！

乙：今次 Lorraine 實走唔甩啦。

丙：唉佢都慣架啦！

(男看文件，突然發現一些東西)

男：我想問，Lorraine 個中文名係咪陳樂怡呀？

甲乙丁：中文名？下，唔知啲…

丁：吖！我記得有次有個客係叫 Lorraine 做陳樂怡小姐嫁！

男：原來 Lorraine 就係樂怡！我終於搵番佢啦！（慌忙收拾）

乙：阿男你做咩呀？

男：(興奮)你地知唔知佢會喺邊度見林總？

丁：我收到料佢地會喺蘭桂坊 Yo Bar 度見，仲包埋場添！

男：我知道啦，唔該晒！

丁：喂你想做咩呀？

(男走) (眾人走 / scene change -)

Scene 6

(男出) (雜吵聲) (男入台右拉怡出)

怡：你做咩？癲左線牙你！放手呀！

男：Lorraine 呀！個林總出左名大淫蟲，你同佢一齊，佢實會傷害你嫁！

怡：好笑，咁又點呀？付出少少代價就可以換錢換地位，我唔 mind 啫。

男：樂怡以前唔係咁嫁。

怡：我唔知你講緊邊個。

男：其實你一早知道我係阿男，係咪呀樂怡？

怡：我係 Lorraine。

男：你唔好咁啦好唔好？係我蠢一直都有發現係你，但以後我地一定可以好似以前咁。

怡：以前？乜你認為我地仲有可能番番去以前咩？

男：一定可以！因為我地打過勾勾話係一世嘅好朋友！

怡：(冷笑) 你唔好傻啦，以前嘅野已經過去。我而家有權有財有勢，人地聽見我個名都忌我三分，仲有大把男人爭住同我出街。我已經再唔係以前嗰個淨係識得喊嘅樂怡。

男：樂怡，你幸唔幸福呀？

怡：你講咩呀。

男：樂怡，你跪陳太嗰陣幸唔幸福呀？

怡：嗰陣係時勢迫人。

男：咁番工嗰陣呢？個個都怕左你，唔敢同你講野，你開唔開心？

怡：唔好再講。

男：掩飾自己，戴面具做人，你開唔開心？

：為左名利放棄尊嚴，放棄自己，你開唔開心？

：為左份約，你甚至去陪男人飲酒，出賣自己身體，你開唔開心？

怡：你收聲呀。

男：有權有財有勢，但你其實根本乜野都有！

怡：林奕男你收聲呀！

(怡推倒男) (媽出)

怡：我嘅感受你會明咩？

媽：你有冇試過付出左真感情但比人傷害？

怡：你有冇試過付出左真感情但比人傷害？

媽：你有冇試過憎自己憎到想殺死自己？

怡：你有冇試過憎自己憎到想殺死自己？

媽：你有冇感受過咩叫時勢迫人？

怡：你有冇感受過咩叫時勢迫人？

媽：你有冇試過因為想番番去以前而喊？

怡：你有冇試過因為想番番去以前而喊？

媽：你要爭取權利、錢，仲有地位。

怡：爲左對我有利益嘅野，我要不擇手段去得到。

媽：你要聽佢地話，順從佢地。人地要你跪，要你笑。

怡：人地要我跪，我就跪，笑就笑。

媽：就算被逼，唔情願，人地叫你做乜你都要照做。

怡：就算係被逼，唔情願，人地叫我做乜我都要照做。

媽：一定要掩飾自己嘅真感情。

怡：然後掩飾自己嘅真感情，戴面具做人。

媽：你要學識呢個道理。

怡：呢個就係係社會生存嘅道理。

媽：咁就唔會有人可以傷害到我地。

怡：只有咁，我先唔會好似媽媽咁比人傷害。

男：（微頓）樂怡，你望下個天！

（light change）

男：見到啲星星嘛？

（怡沈默）

男：喺夜空上面，雖然星星並唔及黑色咁廣，但就比黑夜更奪目。

人生冇錯係充斥住好多唔如意嘅事，就好似黑色嗰部份一樣，但只要我地細心留意，就會發現除左黑色以外，仲有好多細小嘅幸福存在住。

（媽走）

男：其實所有野都只係出於選擇，人總可以用選擇去掌握自己嘅命運。

你話你已習慣左係人地面前掩飾自己，忘記左最真嘅自己。但以前同我一齊睇星星，覺得星星會笑嗰個，就係最真嘅你！

怡：嗰啲已經係過去。

男：好吖，我地唔講以前，講而家！果次同我踩水氹玩得開心嗰個，唔通唔係你最真實嘅一面？

怡：我唔知道…

（男弄亂怡的頭髮，用力弄痛怡）

怡：（反抗）好痛呀！

男：你睇下！我打你，mee 你，你會痛！你開心嗰陣無論你點掩飾你都會忍唔住笑咗出嚟，呢啲出自你個人嘅感覺，人地係冇可能控制到！人生最大嘅幸福就係可以忠於自己，就算你有權有勢有幾多財產都唔會換得到呢種幸福。

怡：表現出自己嘅真感情，真係會得到幸福？

男：唔！你願唔願意相信我，相信小男吖？（伸出手指尾）

（秘書出）

秘：Lorraine 小姐，林生要我叫你即刻入番去。

男：你入去同個林總講，就算佢唔幫你簽約，你以後都唔會再去陪佢。我會喺度等你，等到你出尼之後，我地一齊走，一齊去睇星星吖！

怡：你要等我呀。

男：我一定會，就好似以前咁。

(怡入，男等著，等了很久)

(玻璃打碎聲)(尖叫聲)(秘書出)

男：(望門)樂怡？發生左咩事呀？

秘：(受驚)唔關我事嫁，係林總佢用樽打佢個頭…唔關我事嫁…報警！快啲報警！

(秘書入)

(男受驚，走至台中跪下)

(C H R O U S)

A：你做左乜野。

B：你做左乜野。

男：我叫佢相信我。

A：咁個結果？

B：係點？

男：我唔想嫁，我真係冇諗過會搞成咁！

A：血！

B：你害死左佢。

男：我有做錯咩？我只不過想佢做番自己，我有做錯咩？

A：你根本唔適合呢個世界度生存。

C：佢係我地愛戴嘅上司。

A：佢相信左你。

B：你害死左佢。

C：一切都係你錯。

D：你係異類，係瘋子。

A：你根本唔適合呢個世界度生存。

D：你仲害死埋佢。

媽：我地一直都生活得好好。

A：佢相信左你。

B：你害死左佢。

C：你害死左佢。

D：你害死左佢。

B：血！

媽：殺人兇手！

怡：以前嘅樂怡已經唔存在喇，點解你仲要咁執著！

A：血！

怡：係你害死我。

C H R O U S：你害死左佢。

Scene 7

(怡出)

怡：嗰晚我比人送左入院，昏迷左兩日。我番番公司，先知道阿男辭左職，公司所有人都唔知佢去左邊。我嘗試打過電話搵佢，但打左千次萬次都有人聽，我每日，唔係，係每時每分每秒每一刻都喺度等佢電話，但佢一次都有覆過我。佢就好似人間蒸發左咁。

：幾年之後我辭左公司份工去左讀心理及精神學，希望可以好似阿男咁治療人地嘅心傷。點知竟然比我撞番佢，可惜佢已經唔再記得我。

(男像個孩子般走出)

：我聽送阿男尼嘅社工講，阿男係因為受到好大嘅刺激所以先會搞成咁。而佢受刺激嗰日，就正正係我比林總打傷嗰晚。

男：樂怡，你睇下！係星星呀！

怡：阿男而家封閉左喺自己世界裡面，停留左喺佢最想停留嘅一段時光。雖然佢睇唔到我，亦都聽唔到我講野，但我知道佢而家一定好快樂。

怡：(望男)小男，你永遠都係我嘅星星。

男：(望怡)樂怡，你永遠都係我嘅星星。

— 完 —